

## Kunngissaq pillugu inatsimmik nalunaarut

Matumuuna nalunaarutigineqarpoq kunngissaq pillugu inatsit, tak. inatsit nr. 170, 27. marts 1953-imeersaq, inatsisip 528-p 12. juni 2009-meersup malitsigisaanik allannguutitalerlugu.

**§ 1.** Kunngiussuseq kunngip Christian X-ip aamma dronning Alexandrine-p kinguaavinit kingornunneqartassaaq.

**§ 2.** Kunngip imaluunniit dronningiusup toqunerani kunngiussuseq pineqartup ernerata imaluunniit paniata pigilissavaa, taamaalilluni angajulleq nukarlermiit siulliutinneqassalluni.

*Imm. 2.* Kunngip imaluunniit dronningiusup qitornaasa arlaat toqusimappat, pineqartup ammut kinguaavata taanna taarsissavaa aamma malittarisassat imm. 1-imi aalajangersarneqartut malillugit.

**§ 3.** Kunngi imaluunniit dronningiusoq toquppat kunngiussutsimik kingornussisussamik kinguaaqarani, kunngiussuseq pineqartup qatanngutaata angutip imaluunniit qatanngutaata arnap pigilissavaa. Kunngi imaluunniit dronningiusoq arlalinnik qatannguteqarpat imaluunniit pineqartup qatanngutaasa ilaat toqusimappata, malittarisassat § 2-miittut taamatulli atuutissapput.

**§ 4.** Aalajangersakkat §§ 2-miittut aamma 3-miittut naapertorlugit kingornussisussaqanngippat kunngiussuseq tamatuma kingorna kunngip Christian X-ip aamma dronning Alexandra-p kinguaavini angajoqqaaminnit qaninnerpaatut ilaqutaanut ingerlaqqissaaq aamma §§ 2-mi 3-milu aalajangersarneqartutut angajulliit nukarlerniit taamatut salliutillugit.

**§ 5.** Qitornat inatsisit malillugit aappariinnermi inunngorsimasut kisimik kunngiussutsimik kingornussisussaataapput.

*Imm. 2.* Kunngip imaluunniit dronningiusup katissinnaaneranut Folketingip akuersinissaa piumasagaataavoq.

*Imm. 3.* Kunngiussutsimik kingornussisussaq katippat kunngi imaluunniit dronningiusoq statsrådimi akuersitinnagu, pineqartup kunngiussutsimik kingornussisussaataanini aamma aappariinnerup iluani qitornartaami taakkualu qitornaasa kunngiussutsimik kingornussisussaataanerat annaassavaa.

**§ 6.** Aalajangersakkat §§ 2-5-imiittut taamatulli atuutissapput kunngi imaluunniit dronningiusoq kunngiussutsimik piginnilerumanngippat.

**§ 7.** Inatsit una atortuulissaaq Danmarkip Naalagaaffiata Tunngaviusumik Inatsisaa 5. juni 1953-imeersaq peqatigalugu.

## § 2

Inatsit atortuulissaaq Lovtidende-mi nalunaaruteqarnerup aqaguani.

*Statsministeriami tunniunneqarpoq, ulloq 4. september 2009*

LARS LØKKE RASMUSSEN

/Anne Kristine Axelsson